

四庫全書

集部

欽定四庫全書

集部

五百家播芳大全文粹卷九十一

詳校官侍郎_臣劉躍雲

助教_臣常循覆勘

總校官編修_臣王燕緒

校對官中書_臣范 鏊

謄錄監生_臣黃嘉績

欽定四庫全書

五百家播芳大全文粹卷九十一

宋 魏齊賢

葉 榮同輯

文

勸農文

張敬夫

淳熙三年二月既望靜江守臣率其屬勞農于郊進父
老而告之曰民生之本在於農事農事之修貴于墮力治

其陂澤利其器用糞其田疇其耕也必深其耘也必詳日夜以思謹視詳審無或鹵莽且率其婦子相與協濟其事用力之瘁如此而後收穫之報可得而期吾力既盡至於豐歉之不常則聽之於天焉豐歉之不常雖係於天而亦由於人事有以致之也郡縣之吏苟或為政之不平聽訟之不明察獄之不精賦斂之無名使其間或有枉不得直冤不自伸則一夫之怨氣亦足以傷陰陽之和而況於其甚者哉此則太守與官屬之責所當日

夜警戒勉勵無敢少忽其責雖在於郡縣之吏而亦有
繫於爾百姓者焉閭里之間若父子孝慈兄弟友睦夫
婦和輯長幼協順存尊君親上之心無悖教犯義之習
興謙遜廉恥之風息爭奪鬪訟之事自然和氣薰蒸乖
厲屏伏豐年之應可以感召又父老長上之責宜相與
丁寧率勸使皆去惡趨善以承天休是太守之所望也
然則斯事之艱既繫於農民之瘡力又繫於官吏之能
政又繫於風俗之趨善天人叅會上下相應然後可以常

獲嘉報而多享豐年顧不美歟父老其體此意毋忽

勸農文

朱晦翁

竊惟民生之本在食足食之本在農此自然之理也若夫農夫之為務用力勤趨事速者所得多不用力不及時者所得少此亦自然之理也本軍田地磽确土肉厚處不及三五寸設使人戶及時用力以治農事猶恐所收不及他處而士風習俗大率懶惰耕犁種蒔既不及時耘耨培糞又不盡力陂塘灌溉之利廢而不修桑柘

麻苧之功忽而不務此所以營生足食之計大率疏畧
是以田疇愈見瘦瘠收拾轉見稀少加以官物重大別
無資助之術一有水旱必至流移下失祖考傳付之業
上虧國家經常之賦使民至此則長民之吏勸農之官
亦安得不任其責哉當職久在田園習知農事到官日
久目覩斯弊恨以符印有守不得朝夕出入阡陌與諸
父兄率其子弟從事於耘耨耒耜之間使其婦子含哺
鼓腹無復饑凍流移之患庶幾有以上副聖天子愛養

元元夙夜焦勞惻怛之意昨於去冬嘗印榜勸諭管內人戶其於農畝桑蠶之業孝弟忠信之方詳悉備至諒已聞知然近以春初出按外郊道傍之田猶有未破土者是父子兄弟猶未體當職之意而不能勤力以趨時也念以教訓未明未忍遽行笞責今以仲春舉行舊典奉宣聖天子德意仍以舊榜並星子知縣王文林種桑等法再行印給凡我父兄凡我子弟其敬聽之哉試以其說隨事推行於朝夕之間必有功效當職自今以往

更當時出郊野巡行察視有不如教罰亦必行先此勸諭各宜知悉

勸學文

歲二月農事始興太守奉德意修時令以其僚勸勞我民於近郊太守有言父兄子弟其聽之天畀我邦實惟聖人潛躍之地乃眷南顧湛恩異焉惟昔夏秋天久不雨所以仰勤宵旰甚厚帝用鑒回神龍授職呼吸之際化饑為穰凡今得以仰事俯育歡欣怡愉者上帝之昭

答聖意如此我民何能然哉欲報之德惟忠惟孝惟儉
惟勤閭里休戚相通婦子饋饁以時上不干寬大之刑
下不待言色之教使忠厚和樂之氣充於四境之間而
有水旱癘疾之憂者吾不信也若曰尚氣終訟習俗之
常棄本逐末其利自倍則非太守之望於父兄子弟也
太守亦將有以佐聖意厚斯民者其尚敬之無忽

勸農文

去歲之春同我父老敬以德意布於閭里務飭農桑以即

忠厚太守拙政不敢擾民吾民勤躬各願敦本雨暘以
序黍稌悉登傳聞四方稱誦一口此聖主覆載之德百
神持護之功太守何有焉然人之情始勤終怠責天罪
歲易以忘憂逮鹵莽而報予已吁嗟而無及芎葉之茂
協氣鼎來為此酒尊樂汝婦子此意厚矣其報伊何其
力其誠以謝聖德

勸農文

蓋聞民生在勤勤則不匱况操耒耜錢鎛服田力穡而

為老農者哉爾其聽太守言太守受天子命復鎮此邦固不專於聽斷會計簿書獄訟而已其職則以勸農為事今明告爾爾有身則有役有土則有租有家則有仰事父母俯育妻子之奉又有歲時伏臘祭祀冠昏喪葬之費爾今不盡力於田則何以給力役何以供租稅何以為仰事俯育之奉歲時伏臘祭祀冠昏喪葬之費哉夫凍耕熱耘霑體塗足此固爾農之所甚勞也然秋成上熟禾黍登場芟如雲積如壙春如玉以通工易事則

衣有餘布用有餘器帑有餘貲至於具雞豚具酒醴設
為飲食與親戚朋友歡忻宴聚優游卒歲則其樂亦誰
如爾農者聖主惠顧潛邸視他鎮為特厚故慎擇太守
必使知民疾苦為之太守仰承德意奉行惟謹亦爾輩
所共知也維時中春土膏動而草木萌爾盍亦相率其
法朝夕盡力從事於南畝不忘太守已飭屬縣毋興修
以廢爾事毋追胥以妨爾役毋科歛以竭爾力有不然
者爾其亟告太守以拯後患又彈治之爾無謂此為虛

文而弗聽也

勸農文

往歲之春同我父老敬以德意布於里閭務飭農桑以
即忠厚今歲二月復與父老飲於近郊前云在耳奚俟
多訓太守極政無以禁末吾民服勞宜各敦本勤身而
得約力以用仰事俯育固有餘樂不幸而遇水旱亦可
無憂若曰饑穰在天何與於我棄本逐末其利自倍非
聖主宵旰勤民之意非太守所望於兄弟父子也其肅

敬之母忽

勸農文

國有常賦惟爾民是供爾尚致乃心力務植桑穀以富
於而家豐於而國常賦之外吏將何求凡我父老聽予
話言春將既暮時不可失毋苟自安毋憚作勞以治公
及私歲有秋則予與爾衆惟喜康共汝不念於厥訓不
治於厥賦乃自災於厥身吏則有愆亦有乖於上意欽
哉惟時汝尚其勉之

勸農文

惟聖人克謹民事邦國厥有常憲每歲仲春乃命守令
履行阡陌用懋勸於農人有司茲率厥典奉若天子之
命爰暨家僚躬造於郊於是田畯及鄉三老咸在乃登
進厥農而告之曰民生在勤勤則不匱時維古先哲王
罔不惟農是務亦越惟我國家惟農是恤今茲東作伊
始土膏脈發嗟嗟我民亦又何求如何新畝爾其秉乃
耒舉乃耜具乃錢鏹以俶載於南畝汝惟服田力穡乃

亦有秋用孝養厥父母以寧爾父子乃飲食醉飽亦職
有利哉其或廢爾時奪爾力害爾功弗恤弗矜乃事茲
惟有司之愆汝如惰農自安不習作勞不服田畝越其
罔有黍稷則弗克養厥父母則凍餒其妻子乃爾自底
於困窮嗚呼爾其無悔我爾共勉哉

勸農文

當職去歲仲春之月始獲治事竊聞前此小輩相仍細
民艱食帑廩空乏大以為懼於是躬加勸勉息鬪訟寬

圉圉省追呼禁遊手唯恐一有妨農仰賴天時俯藉人力秋稼告成倉廩盈億非唯爾農得享終身之樂伊予滿考而四民安業亦足以自慰是則爾農之勤既有明效矣矧今初春雪為豐年之兆爾其勉聽吾訓勿廢前功父詔其子兄語其弟毋好爭競毋犯憲典毋慢親戚毋事末作悉心一力專務於農當耕即耕當耘即耘毋乖天時可闢即闢可墾即墾毋遺地利自今以往年穀屢登家有餘食仰事俯育各無愧怍苟或游惰自安不

服田畝其於收成之際無可刈穫啼饑號寒雖悔何及

勸農文

二月令尹出郊勸農故事也然農不可以為故事而不
勸令不可以為故事而不勸雖曰具文意實追古夫勸
農之令既修則妨農之事當革國有常賦外或誅求則
妨農令有調度外或私役則妨農今更無一事妨農矣
農其可自妨乎游手以逐末飲博以逞誇自妨也鬪狠
以累其親健訟以破其家自妨也夫不耕不耘一旦迫

於饑寒則不肖之心生抵於罪咎將誰執況今土氣蒸
達膏雨沾足汝父兄各勉其子弟澤澤其耕厭厭其苗
天有時毋違其時地有利毋失其利官無一事以妨農
農無一事以自妨將見千斯倉萬斯箱含哺鼓腹同為
太平之民詩云豐年多黍多稌亦有高廩為酒為醴以
洽百禮豈不甚可樂哉比之事游手以速啼號之患好
鬭訟以罹刑辟之厄其利害豈不灼哉

檄文

漢左丞相諭燕檄文

呂伯恭

二年冬十月漢左丞相韓信檄告燕王吏民等燕趙之
為與國也輔車相依雄長北邊自以為子孫萬世不拔
之業也陛下起布衣提三尺劍率東諸侯西入關誅無
道秦如振槁木回視燕趙何啻几上肉然徘徊京索間
二年於茲矣而未即北首以方南向與楚爭天下故未
能加誅耳今楚兵罷力盡天亡之時而燕趙之師各帶
甲十萬未有率先遣一人一騎渡河而助漢意者拱手

而視其孰勝陛下不能平也故遣信與故常山王以兵
三萬請命於趙趙成安君有百戰百勝之術聚兵井陘口
號二十萬井陘之道車不得方軌騎不得成列信舉鞭
一揮成安君惛然就戮斬死泚水工身首異處為天下
笑信遣使還報願與士大夫乘兵鋒北扣燕路昔常山王
與成安君杖馬箠王趙猶能制燕死命今輔以強漢破
燕必矣陛下念燕王本無畔漢意徒以道路隔絕壅於
上聞故令信奉以尺書諭陛下意使王自為計能戰即

戰不能戰即早降漢無徒苦人父子兄弟為也旦莫王
從成安君游矣今王來陛下必赦王罪大者王小者乃
侯耳不然常山王將左信將右以強漢之兵並趙二十
萬衆長驅北道經易水抵幽薊涉遼而東與王並逐於
無終之下當是時王不能降漢矣信聞之轉禍為福知
者之謀也捨順取逆愚者之策也燕固多奇士而能為
王圖萬全畫至計王自擇焉燕吏士百姓能以王降者
受上賞以城邑降者受中賞餘鄉里自效者受下賞能

自拔歸者與田宅復其身毋自從王死使父母兄弟肝
腦塗地膏潤野外生為愚夫死為暗魂豈不謬哉且信
之用兵諸君之所共知也一出而擒魏王豹虜代相脫
使孫吳復生不足為諸君計矣檄到而亟思自勉諭陛
下意毋忽

幽燕檄文

唐子西

我國家運啟漢符疆包禹迹際天所覆無不照臨盡海
以還悉皆臣妾措舍生於壽域躋寰宇於聖涯惟燕督

亢之圖得古幽州之域鼓刀屠肆俱懷義烈之風擊筑
行歌咸有英雄之氣曩因悖臣割啖敵國邀功一時貽
禍萬世名宗令姓遂為異域之人奇士秀民永棄無知
之俗蔑聞五教何啻百年風俗寢移已變李陵之漢服
謳謠未改豈忘莊舄之越吟朝廷哀爾無辜淪於不化
嚴刑酷罰虐我遺黎安土重遷據吾故地爰整弔民之
旅不違徯后之情復千里之闕河拯一方之塗炭今則
遼東歎塞唇齒益寒靈武擗牙膚臂皆斷孤危之勢顛

覆可知倘能用夏變夷捨逆取順其加信賞當倍常科錄可用之新毗蠲無名之暴斂庶令陷溺復覩太平

諭交趾文

王元之

皇上之嗣位之五祀國家將取交趾歲貢賤臣江集謹頓首上言請為文以諭之曰夫中夏之有蠻貊猶人身之有四肢也運動伸屈隨諸人心故曰心為帝王之謂矣苟一手一足間血脉有滯筋骸不寧則必藥餌以攻之攻之未和則必鍼砭以達之非不知藥餌苦口而鍼

砭破膚也蓋所損寡而所益多矣君天下其猶是歟我
太祖皇帝受禪於周啟國在宋聲名文物一變返古居
帝王之位視蠻貊之病故一之二歲藥庸蜀餌湘潭三
之四歲鍼廣越砭吳楚筋髓血脉渙然小康非王者神
機睿畧疇能至於此乎洎我后嗣守丕基躬攬庶政而
以為糾紛者心腹之病也苟心腹未治四肢庸能治乎
於是鍊仁義之藥餌修道德之鍼砭大瘳於病一進而
愈九州四海既康且寧顧爾交州遠在天末實五服之

外亦四肢之餘譬之於身猶一指耳雖一指之患聖人
得無念乎是用開爾昏庸被我聲教爾其從乎況在有
周白雉來獻降及炎漢銅柱高標至於皇唐常曰內地
唐末多難未遑區平今茲聖朝孟覆萬國太平之業亦
既成矣封禪之禮將以修矣俟爾至止康乎帝躬爾無
向隅為我小恙俾我為絕蹠斷節之計用屠爾國悔其
焉追矧夫爾水生珠我沉於泉爾巖孕金我捐於山非
利爾之寶也爾民頭飛我有車馬爾民鼻飲我有酒食

用革爾之俗也爾民斷髮我有衣冠爾民烏語我有詩
書教爾之禮也煌煌炎洲煙蒸霧煮我飛堯雲洒爾甘
雨湯湯瘴海火燒日鎔我張舜琴扇為薰風爾天星辰
人謂不識我迴紫微使之拱極爾地魑魅人懼其怪我
鑄大鼎使之不害出爾島夷觀明堂辟雍乎脫爾卉服
觀華袞山龍乎爾其來乎無速厥辜方將整其車徒戒
其鉦鼓向化我其赦逆命我其伐惟向背吉凶在爾審

勅榜交趾文

王介甫

勅交州管内峒軍民官吏等眷惟安南世受王爵撫納之厚實自先朝含容厥愆以至今日而乃攻犯城邑殺傷吏民干國之紀刑茲無赦致天之討師則有名已差吏部員外郎充天章閣待制趙高充安南道行營馬步軍都總管經畧安撫招討使招宣使嘉州防禦使入內內侍省都押班李憲充副使龍衛四廂都總管指揮使忠州刺史燕達充副都總管順時興師水陸兼進天示助順已兆布新之祥人知侮亡咸懷敵愾之氣然王師

所至弗迂克奔咨爾士庶久淪塗炭如能諭王內附率
衆自歸爵祿賞賜當倍常科舊惡宿負一皆原滌乾德
幼稚政非已出造廷之日待遇如初朕言不渝衆聽無
惑比聞編戶極困誅求已戒使人具宣恩旨暴征橫賦
到即蠲除冀我一方永為樂土

提轉考課勅文

先王考績之次序雖見於經而其詳不傳於後世朕若
稽古以脩衆功而諸路刺舉之官未有以考其賢否比

勅有司詳議厥制條奏來上詢謀悉同其使布宣以勵
能者而擇左右可信之良使典治之古人有言徒善不
足以為政徒法不能以自行今朕有念功樂善之志焉
而又繼之黜陟幽明之法以待天下之大吏矣然非夫
任事之臣躬率以正而考慎其實與士大夫之宣力於
外者皆安於禮義而不以便文徼幸為姦則朕之志豈
能獨信於天下而法亦何恃以行哉咨爾在位其各悉
力一心務祇新書以稱朕至誠惻怛之意

誠勵諸道轉運使經畫財利寬恤民力文

王介甫

夫閔仁百姓而無奪其時無侵其財無耗其力使無憾
於衣食而有以養生喪死此禮義廉恥之所興而二帝
三王誠勅百工諸侯之所先後世不可以忽者也朕夙
興夜寐聽治不怠園游宮室之觀無所增飾而躬以節
儉先天下之事然而不忍人之政考之先王未有以及
之也凶年饑歲民之父子夫婦猶有不得保其家室而

放乎溝壑意者吏或不良不知所以振救省憂之方而使之至此耶今吾別諸道置使者使得察吏之良否而視民之疾苦輒具以言而任事者或不惟朕志之所急而以侵牟之為政甚非所以遣使者慰安元元之意也夫轉輸天下之財以給有司之費皆有常數而無橫求誠能御輕重斂散之權而禁因緣之姦則何患乎經入之不足彼前世良吏能紓其民而官事亦不耗廢者豈有他哉亦在乎勉之而已若乃操聚斂之贏以為功而

不知百姓與足之義非惟逆於朕志而有司考績之法亦將不汝容焉朕言惟服其聽毋忽

晉征虜將軍征討大都督破苻堅露布

王介甫

尚書五兵臣石等言臣聞衆勝天而足勝人終歸助順直為壯而曲為老烏可恃強自古以來斯理可考所以牧野若林之師罔敵有周昆陽彗雪之鋒亦殲於漢蠢茲狂虜撓我清時迨茲妖孽之平永息煙塵之警恭惟

皇帝陛下握符出震秉籙乘乾嗣元帝之鴻圖紹隆基緒繼金莖之正統惟御紀綱俊彥具來丞髦咸入惟符堅之凶虐據中夏以憑陵陷張掖而吞西涼失吾藩輔破邢州而得鑿齒俘我英賢罔知倚伏之機徒使驕淫之役徙其民戶弗念阿脂之歌寵厥鮮卑不顧魚羊之讖將取滅身之禍乃興入寇之謀蕩析里閭誅求車甲遠則忘故老垂絕之論近則忽羣臣至切之言埽境而來罔民於死將整師而臨滄海欲投鞭而斷江流臣石

等督率丞徒奮揚義武彗彼箕尾謫久見於盜區歲次
斗牛祥已開於王畧休符默兆勇氣倍增彼方嚴洛澗
之屯我已効梁成之首捨項城之蟻聚瞰淝水以狼貪
隔岸相持對營並峙用輔國之長策因朱序之漏言謂
欲交鋒盍先退舍所賴神奪之鑑天誘其衷輒因觸於
禍機獨自投於死地初意乘危邀險勢若建瓴寧知進
易退難敗同解瓦既前部之告潰復陽平之云亡弓撥
矢鈞紛爭投於鎧仗轍亂旗靡競大棄於雲屯時惟謝

玄功冠諸帥以八千之剽悍剪百萬之腥羶符堅流落
草萊間關險阻傷既深於流矢食不厭於壺飧顛躓窮
途過項羽烏江之窘零丁馬匹猶朱祐官渡之歸殘息
僅存措躬無所臣石等濫司戎律親稟睿謨雲龍風虎
運際功名之會風聲鶴唳威加僭亂之區援桴鼓以忘
軀奏鐔鐘而獻凱斯皆王靈遠被聖畧遙臨復前世之
深讐雪遺黎之宿憤華夷閭閻日月清明登灞岸而望
長安共興感慨封狼居而禪姑衍當効驅馳

擬李靖破頡利可汗露布

尚書兵部臣聞周征玃狁長驅北伐之師漢討匈奴用
絕南牧之患惟帝王之耀武亦今古之同風我國家乘
五運以膺圖順三靈而改卜義旗方舉萬民喧桃李之
歌神武維揚四海絕萑蒲之盜建德尋膏於碓鎖世充
俄繫於俘囚武周則瓦解以無遺黑闥乃土崩而自盡
而杜伏威鋒屯江表東手來降徐圓朗鼠竊山東連頸
受戮蕭銑之兵銷嶺外薛舉之電埽隴川民心於是悅

隨王業以之大定唯茲左袵滯我休戈頡利豺狼其心
腥羶異類信天地之偏氣為聲教之外臣前王示含育
之恩歷代患羈縻之術和之則防如蛇豕違背軟盟攻
之則遁若犬羊疲勞師旅我高祖以洪基肇創黔首未
安慮王化之不敷捨鬼方而弗顧稔以稱臣之禮加其
厚往之儀持神鋒而方俟斬鯨豢良犬而未遑顧鬼謀
臣為之切齒壯士為之銜冠天威久戢於雷霆醜族逾
滋於蜂蠆伏惟陛下經綸草昧埽蕩攬搶出震宮而日

麗九天朗皇道而風行八表痛心疾首長思渭水之浸
繕甲理兵待問鐵山之罪而又侵陵王土騷動邊民稔
惡貫以既盈奉天誅而無赦臣等徂征授鉞仗義平戎
執乎彼曲之辭乘以我盈之勢鼓輦動地三春掀蟄震
之雷戈甲連雲千里散龍沙之雪指陰山而直入趨馬
邑以兼程康蘇密應變知機先來款附蕭皇后離邦去
里再見京師頡利有此敗亡方來朝謁甯中餓虎暫為
掉尾之求構上饑鷹終有背人之意臣與副將張某等

知其猶豫恐恣猖狂遂乘無備之時爰作襲人之計齎
二旬之路食擁一萬之精兵火炎而立見燎毛雷疾而
寧容掩耳斬俘馘於萬級虜羊馬於千羣頡利生擒渠
魁斷首盡復恒安之地永清大漠之塵韋韞毳幕之人
從茲率服浴鐵衽金之士將見凱旋臣等職忝專征材
非善戰實賴自天之祐敢言破虜之功遙荷皇威不辜
閩外之寄咸知睿算自驅堂上之兵俟見興耒耜於沙
場戢干戈於武庫憧憧夷貊長傾捧日之心寂寂邊城

永罷防秋之後臣等無任樂聖戴天抃舞歡呼之至

雜文

代伯益上夏啟書

王元之

臣益言臣與先帝比肩事堯舜在二十八人之數先帝以老臣為賢以天下授臣臣德薄力寡不足當之且知天意人事盡歸於吾君矣今君身臨大寶手握神器老臣得伸一言以為裨益哉夫天下者非一人之天下乃天下之天下也理之得其道則民輔之失其道則民去

之既去又孰與同其天下乎故帝堯不授於子而授於
大舜大舜不傳於家而傳於先帝蓋恐失道而民去矣
是知親一子則不能子兆民成一家則不能家六合聖
人之用心也如是先帝得之雖勤吾君繼之或忘其勤
臣恐失大寶而毀神器也先帝力拯橫流為民粒食得
九疇定九州乘四載距四海櫛風沐雨奠山濬川却昏
墊之憂平水土之患以父殛而是念聞子哭而不名然
後六府孔修四隩攸宅興播殖之利定貢賦之差億兆

熙熙以成淳化是以受禪而有天下可謂艱難矣及其
在位也卑宮室惡衣食見罪人而泣聞昌言而拜故能
會諸侯於塗山執玉帛於萬國可謂勤儉矣今君得不
思其艱難乎念其勤儉乎且創業者易守文者難始則
苦於焦勞終或流於逸樂今君生居帝宮坐即天位勿
謂家傳之勿謂已有之宜惕惕而懼其失也矧乎天無
所親親於有德人無所懷懷於有仁苟不肖而棄先業
亦為臣羞吾君以臣言為何如哉聽用之則盟於案几

可也罪咎之則斥於荒裔可也庶幾老臣骨朽泉壤見先帝而可無愧色矣斯言非佞君其念之

擬留侯與四皓書

王元之

漢丞相留侯張良謹裁書遣使致於商山四先生侍者蓋聞有天地以來聖人曰軒轅有崆峒之請又曰帝堯有箕山之讓況乎風移世變民澆化漓北面而為臣者乎有國家之未決智慮所不及得不取資於賢士哉先生抱大道藏大器榮辱之事出於身外興亡之理了於

掌中膠漆雲泉泥滓爵位瓊林瑤池以游以息雲漿霞
饌以飲以食蒼松翠柏先生之交也青鸞紫鳳先生之
駕也龜亡鶴夭神氣愈清桂朽椿枯童顏未改萬乘不
能屈其節千金不能聘其才真所謂神仙中人風塵外
物然而歷觀古之聖賢未嘗不有意於民也故隱見隨
其時語默得其所進則為天下之福退則知天下之亂
在昔暴秦勃興荼毒華夏虎猛擇肉網密凝脂君政甚
於豺狼人命輕於草芥先生知國不可輔民不可化拂

衣高蹈遁於山林其隱也可謂得其時矣今皇帝奮布衣持利劔撥大亂定大難起龍虎於豐谷會風雲於泗濱席捲亂秦電埽強楚可謂英雄矣既而草秦之暴纂堯之緒定覆孟之固成垂拱之風唯於儲嗣之間忽有廢立之議臣下股慄勿敢違寧良與帝同起於草莽間始五六年經七十戰出奇畫策未嘗有一事見違唯於此時言不獲用良掉三寸舌為帝者之師封萬戶侯乃布衣之極敢於此際愛死不諫乎蓋恐死而無益於國

事矣又聞古之有天下者禪讓於賢今之有天下者封
立其子亦已德薄不古矣苟不選賢擇能樹嫡立長能
無毀宗社乎今太子為人忠良立事貞固少海流潤渚
雷振聲三善克隆百技無爽帝欲廢而不用天下惻然
朝廷愕然先生於此時可不有意於民哉良願先生出
雲關開岫幌駕玄鶴馭金虬俯降殿庭辱對旒冕定天
下之疑惑君上之臆見語默之道豈獨美於昔賢聊以
工佐聖人之所議望先生無截轅杜轡之虞發函一披

則萬國幸甚

擬裴寂禱華山文

伊太華之峻極故神明之攸宅司上帝之賞罰主下民之休戚俾福善而禍淫類設官而分職在乎區別賢愚較量淑慝苟道豐而德茂神宜陰助或行乖而義忒神乃幽責善者所以鍾其祉惡者所以加其殛故載彼祀典饗乎血食視三公之秩永播鴻名列五岳之中亮無慙德是以國得而祭之人得而禱斯既肸鬯之不昧豈

聰明之我欺嗟余生之在世若命薄而數奇倮蟲三百
兮賦予以至靈之性風搏九萬兮誘余以上擊之朋故
戴仁以抱義亦說禮而敦詩異代耕以干祿嘗筮仕乎
神龜君將致於堯舜道本師乎孔姬何宦游之不調沉
下僚而流離負王佐之器處徒勞之資彼鳴鐘以列鼎
余反接乎晨炊彼紆朱以拖紫余獨披夫荷衣彼華軒
以繡轂兮余泣路以漣沔彼雕牆以峻宇兮余衡門以
栖遲歎窮通以未決亦進退而自疑是敢效壯士謁嚴

祠方窮困之至此庶富貴之可知幸示得喪形於夢思
余若位極人臣業展經綸黜陟乎百執啟沃乎一人印
懸斗以炤日沙築隄而絕塵祿千鍾之永保食萬錢以
具陳褒揚信史之中勛庸不朽圖畫凌烟之上德業彌
新余則三黜而無愠五就以求伸俟風雲之胥會期魚
水以相親必也行乎道澤乎民不獨苟其位榮其身使
乎伯道升帝澆風返淳有域皆壽無臺不春雖伊傳兮
呂尚可繼踵而比隣余或命本貧窶位非輔相或沈在

執戟或老於郎署食一簞兮飲一瓢塵飛甑兮魚游釜
履穿東郭以自嘆貂敝洛陽而誰顧詠空囊之錢唯日
怨咨哭窮途之淚棲皇道左余則考肥遯之文結方外
之侶和招隱以裁詩廢歸田而作賦必能守躁君靜靈
府非謂釣虛名沽浪譽然後寂爾叩虛浩然養素谷處
霞棲呼風飲露雖潁水與箕巢可駕肩而接武余志若
是神心則邴苟無言而冥昧俾沒世以蹉跎又安用三
峯秀出千仞高摩但凝嵐而杳靄徒疊石以嵯峨幸靈

貶之一告決榮枯而靡他

遣拙鬼文

西山老拙墮聰塞明升榻而卧其夜夢游乎靈臺之上
再拜如見其君君大言曰使子身安體舒手便足運咸
如所欲生而能然自我所使講學考業窮經博史口耳誦
觀記無遺字日月所習無忘厥能包羅古今皆心之靈
然應鄉書不錄輒出強顏黽勉仕未有日今也誰使子
之文章雖搞華麗藻人厭其質明性順理人譏其拂言

出反笑意動則悖有司意東使子意北有司意華使子
意實譬之匠氏繩墨誤直琢削反曲雕蟲欲終捩手輟
工是皆拙鬼所為子宜驅之余驚而寤作文以遣之曰
予心之神靈於予身窮經好古閱無廢文汝乃反吾巧
而使拙虧吾成而使缺好辭贈爾爾行而決鬼乃躍而
出俛首俯躬而言曰子命昔窮我寄爾躬子命今達我
辭爾室還子之巧收吾之拙聖道是樂紛華無悅學海
心志至剛無歇且戒且勉且泣且別言已翻然而去予

心釋然

弔稅人場文 并序

峽口鎮多暴虎路人過而罹害者十有一二焉行役者
曰其地曰稅人場言虎之搏人猶官之稅人因為文以
弔之其詞曰虎之生兮亦稟亭毒文采蔚以錦爛睛眸
赫其電燭爪利鋒起牙張雪蟲巖乎爾游溪乎爾育匪
隱霧以澤毛唯啞人而嗜肉豺伴羆隣林潛草伏嘯生
習習之風視轉眈眈之目則有霜徑晨征陰村暮宿爾

必搏以療饑啗而充腹骨委溝壑血膏林麓恨鬼長往
悲魂不復旅人無東海之勇嫠婦起太山之哭至使賈
說商談飛川走陸識彼獸之攸暴示斯場之所酷騎者
為之鞭蹄車者為之膏軸鉞者為之發刃弧者為之挾
鏃來之者有備過之者在速鮮不魂驚而神翻思復者
哉於戲虎之搏人也止於充腹官之稅人也幾於敗俗
則有泉湧鹿臺之錢山積巨橋之粟周幽厲之不卹漢
桓靈之肆慾是皆收大半以充國用三夷而禍族牙以

五刑爪以三木搏之以吏啗之在獄馬不得而馳其蹄
車不得而走其轂鉞在匣以誰引矢在弦而莫屬斯場
也大於六合斯虎也害於比屋雖有黃公之勇莫得而
戮雖有卞莊之戰豈得而逐必在乎立道德而為戰為
刃張仁慈而為牢為機俾爾獸之馴擾見我場之坦夷
乃笑兇難惡除澆滌漓帝道以之蕩蕩人心以之熙熙
自來騶虞之仁獸返淳風兮庶幾

催租結局榜

熊子復

年饑用不足猶防暴斂之侵民和動有成果藉樂輸之助發茲愚懇達彼衆情邑莫迫於順興歲且逢於乾旱海鹺之運不至既絕於貨殖戶租之版空存莫搜於利孔幸大府垂憐於小縣而長官特委於末寮奔走經營敢憚再行於原野撫循訓導未嘗一用於鞭笞凡薄賦之錙銖盡細民之膏血雖未填於帑藏亦聊逭於簡書感而遂通已荷羣靈之祐誠不可掩尚須庶俗之孚

訓儉文

司馬溫公

吾本寒家世以清白相承吾性不喜華靡自為乳兒長者加以金銀華美之服輒羞赧棄去之二十忝科名聞喜宴獨不戴花同年曰君賜不可違也乃簪一花平生衣取蔽寒食取充腹亦不敢故服垢敝以矯俗干名但順吾性而已衆人皆以奢靡為榮吾心獨以素儉為美人皆嗤吾固陋吾不以為病應之曰孔子稱與其不孫也寧固又曰以約失之者鮮矣又曰士志於道而恥惡衣惡食者未足與議也古人以儉為美德今人以儉為

詬病嘻異哉近世風俗尤為侈靡走卒類士服農夫躡
絁履吾記天聖中先公為郡牧判官客至未嘗不置酒
或三行或五行不過七行酒沽于市果止梨栗棗柿棗止
于脯醢菜羹器用甕漆當時士大夫家皆然人不相非
也會數而禮勤物薄而情厚近日士大夫家酒非內法
果彘非遠方珍異食非多品器皿非滿案不敢會賓友
嘗數月營聚然後敢發書苟或不然人爭非之以為鄙
吝故不隨俗奢靡者鮮矣嗟乎風俗頽敝如是居是位者

雖不能禁忍助之乎又聞昔文靖公為相治居第于封丘門外廳事前僅容旋馬或言其太隘公笑曰居第當傳子孫此為宰相廳事誠隘為太祝奉禮廳事則已寬矣參政魯公為諫官真宗遣使急召之得之酒家既入問其來以實對上曰卿為清望官奈何飲于酒肆對曰臣家貧客至無器皿果殽故就酒家觴之上以其無隱益重之張文節為相自奉養如為河陽掌書記時所親或規之曰公今受俸不少而自奉若此公雖自信清約

外人頗有公孫布被之譏公宜少從衆公嘆曰吾今日之俸雖舉家錦衣玉食何患不能顧人之常情由儉入奢易由奢入儉難吾今日之俸豈能常有身豈能常存一旦異于今日家人習奢已久不能損儉必致失所豈若吾居位去位身存身亡如一日乎嗚呼大賢之深謀遠慮豈庸人所能哉御孫曰儉德之共也侈惡之大也共同也言有德者皆由儉來也夫儉則寡欲君子寡欲則不役于物可以直道而行小人寡欲則能謹身節

用遠罪豐家故曰德之共也侈能多欲君子多欲則貪
慕富貴枉道而速禍小人多欲則多求妄用敗家喪身
是以居官必賄居鄉則盜故曰侈惡之大也昔正考父
餽粥以餬口孟僖子知其後必有達人季文子相三君
妾不衣帛馬不食粟君子以為忠管仲鏤簋朱紘山節
藻梲孔子鄙其小器公叔文子享衛靈公史鰭知其及
禍及成果以富得罪出亡何曾日食萬錢至孫以驕溢
傾家石崇以奢靡誇人卒以此死東市近世寇萊公豪

侈冠一時然以功業大人莫之非子孫習其家風今多
窮困其餘以儉立名以侈自敗者多矣不可徧數今以訓
汝汝非徒身當服行當以訓汝子孫使知前輩之風俗
云

喻學者

朱晦翁

學如不及猶恐失之此君子所以孜孜焉愛日不倦而
競尺寸之陰也今忽聞諸生晨起入學未及日中而各
以散去此豈愛日之意哉夫學者所以為已而士者或

患貧賤勢不得學與無所于學而已勢得學又不為無所于學而猶不勉是亦未嘗有志于學而已矣然此非士之罪也教不素明而學不數講也今之世父所以詒其子兄所以勉其弟師所以教子弟所以學舍科舉之業無為也使古人之學止于如此則凡可以得志于科舉斯已爾所以孜孜焉愛日不倦以至於死而後已者果何為而然哉今之士惟不知此以為果足以應有司之求矣則無事乎汲汲為也是以至于游惰而不知返

終身不能有志于學而君子以為非士之罪也使教素明于上而學素講于下則士者固將有以用其力而豈有不勉之士哉某是以于諸君之事不欲舉以有司之法而姑以文告焉諸君苟能致思于科舉之外而知古人之所以為學則將有欲罷而不能者某所以企望也

白鹿洞書院學規

父子有親君臣有義夫婦有別長幼有序朋友有信

右五教之目堯舜使契為司徒敬敷五教即

此是也學者學此而已此所以學之之序亦有五焉其別如左

博學之審問之慎思之明辨之篤行之

右為學之序學問思辨四者皆所以窮理若夫篤行之事則自修身以至處事接物亦各有要其別如左

言忠信行篤敬懲忿窒欲遷善改過

右修身之要

正其義不謀其利明其道不計其功

右處事之要

己所不欲勿施於人行有不得者皆反求諸己

右接物之要

某竊觀古昔聖賢所以教人為學之意莫非使之講明義理以修其身然後推以及人非徒欲其務記覽為詞章以釣聲名取利祿而已今之為學者則既反是矣然聖賢所以教

人之法具存于經有志之士固當熟讀深思
而問辨之苟知其理之當然而責其身以必
然則夫規矩禁防之具豈待他人設之而後
有所持循哉近世于學有規其待學者為已
淺矣而其為法又未必古人之意也故今不
復施于此堂而特取凡聖賢所以教人為學
之大端條列如右而揭之楣間諸君其相與
講明遵守而責之于身焉則夫思慮云為之

際其所以戒謹恐懼者必有嚴於彼者矣其
有不然而或出于禁防之外言之所棄則彼
所謂規者必將取之固不得而略也諸君其
念之哉

勸學文

李知幾

稟性受命均是人也非公於顏淵而私於盜跖蓋習之
不同耳孔孟縱橫之紀綱五經浩博疏其淵源諸史異
同撫其可否讀老莊以言為筌蹄論荀揚以道為指歸

夫然後發為事業措為文章或如萬仞峰或為三春柳
拾青紫敷絲綸登金門上玉堂爾亦堯舜爾不桀紂爾
是無他思而已矣誠而已矣

子弟誠

黃魯直

古蠲筆墨如澡身浴德措拭几研如改過遷善敗筆浣
墨瘰子弟職書几書研自黥其面惟弟惟子臨深戰戰
諭學文

吾邑人物秀爽衣冠之盛甲于閩山三歲計偕而摧第

天庭者家有其人皆稽古之力也某承乏令長視事以來不敢以簿書獄訟為能謂非所以教也邑有人民猶家有子弟風化不廣孰任其責今學宮具足而齋館無生員書肆列聚而教官無圖籍竊所愧恥近已整齊窓几聚書數千卷養士數十人立之師長俾典爾業令長將時視勤惰而黜陟其間邑之父兄並倡爾子弟盍簪故區來游于茲令長志也亦爾父兄願也宜悉茲意勿謂文具

檄朋友結課

士懷居不為士莫辭會友之文人不恥何若人當廣齊
賢之見矧國家育士之詔甫及而郡國貢英之典方行
如臨深淵無直羨魚並驅中原誰先得鹿夢回槐國還
驚舉子之忙戰闕棘闈共掉文壇之鞅自非磨犀角擢
象齒安得附鳳翼拔龍鱗惟其一而吹必且多多益
辦白雪陽春雖云寡和高山流水自有知音況人人磨
鉄研之徒个个奪錦標之手文妙黃絹幼婦賦高鳥有

子虛如謂一日暴十日寒豈為千人英萬人傑欲跨烏
騅馬還須扛鼎之人不戰黃鶴樓爭覩降旗之拂詎可
家自為師人自為學要之游必擇士居必擇鄉幸有王
郎同講及時之得可無劉氏益堅同姓之謀過猶不及
惟戒二三期而不至其罰五百凡我既盟之後吾友從事
於斯點爾何如異乎三子之撰聊且自謂或有一日之
長待收拾芥之勲當賈焚舟之勇奮興士氣橫飛得志
之秋大振家聲聯名淡墨之上檄書所至輿議僉從

評書

今時學蘭亭者不師其筆意便作行勢正如美西子捧心而不自悟其醜也余嘗觀漢時石刻篆隸頗得楷法後生當以余說學蘭亭當得之

評寫字法

往年定國嘗謂予書不工書工不工大不足計較事由今日觀之定國之言誠不謬也蓋字中無筆如禪句中無眼非深解宗理者未易及此古人有言大字無過瘞

鶴銘小字莫學癡凍蠅隨人學人成舊人字成一家始
逼真今人學字不按古體惟務排疊字勢悉無所法故
學者如登天之難凡學字先當雙鉤用兩相指疊感筆
壓無名指高提筆令腕隨已意左右然後觀人字格則
不患其難矣異日當成一家之法焉

潘自厚身甫字說

呂伯恭

括蒼潘景憲叔度名其子自厚謀字于其友呂某某復
之曰冠而字周道也弁服未加而字是圖豫也後世先

禮而冠盖有先冠而字者矣眎名考義莫協身甫申之以詞俟講冠禮而用焉其詞曰令月吉辰秩筮蠲尊廼加爾服念厥本根繫人生厚百世一原遷厚居薄奪毗噐昏孰整爾衢孰鍵爾門反身而誠爾本爾存相彼貉貉大摯聿溫爾服逖遺義用不敦相彼黼黻大饗聿殄厚於小體跖弟躋昆厚于大體堯塋舜藩衆萬錯陳磅礴崑崙非物非體不合而渾身斯繹斯爾名式尊曰伯身甫永矢弗諼

楊氏二子字說


楊氏二子其父名從水五行之序水生木則子名當從木故名其子伯曰梓字曰思之仲曰櫝字曰養之二說皆在孟子曰拱把之桐梓人苟欲生之皆知所以養之者至於身而不知所以養之者豈愛身不若桐梓哉弗思甚也故梓以思為字又曰體有貴賤有大小無以小害大無以賤害貴養其小者為小人養其大者為大人今有場師舍其梧櫝養其櫟棘則為賤場師焉故櫝以

養為字梓楸屬也其材甚美為禮樂之器甚宜櫝即梓也名異耳人性皆同是兄弟同氣不可以差殊觀故以二名同出于一本思者思其身之貴于桐梓而求所以養之也養之道當略口體而務心性則思以養之也教雖多術而養不可易故二字同出于一理嗟乎二子能知其性之同而致思焉思而養之而不失其性則道在是矣雖孟子復生為二子計無以易此荀子桀從子游為楊氏求名因書此遺之誨楊氏子亦以警之也楊

氏子搖姨弟也

叔思字說

族人浩與其從兄灝聲相近非所以別長幼也因其來學為之更曰碩字曰叔思浩大碩亦大也大美名也請問大有道乎曰有問大人于孟子孟子對曰從其大體為大人曷為大體曰心是也心之大于耳目者以其能思也能于言行起居飲食之間每事思之不為物欲所蔽則聖功也其為大也孰禦



五百家播芳大全文粹卷九十一

欽定四庫全書

集部

五百家播芳大全文粹卷九十二

詳校官侍郎_臣劉躍雲

助教_臣常循覆勘

總校官編修_臣王燕緒

校對官中書_臣范 鏊

謄錄監生_臣黃嘉績

欽定四庫全書

五百家播芳大全文粹卷九十二

宋 魏齊賢

葉 榮同輯

上梁文

宮殿

建康府行宮上梁文

陳子高

龍蟠虎踞奠昭形勝之區地闢天開鬱起帝王之宅兼

六代神明之觀嗣列聖丕平之基盤庚將治亳商民無
胥怨太保往營洛邑公作迂衡期恢復于中原用撫綏
于華夏皇帝陛下離明繼照乾德健行返六蠹于天中
翔萬馬於江表周世過卜何妨避狄于去邠漢日再中
將見置邸而朝渭今茲兩觀業甍九重穆清得百二之
山河吞八九之雲夢謝安肇建太極庶足慰蒼生之心
蕭何因治未央非特為後世之計肆涓穀日爰架栢梁
式贊歡謠敢伸善頌

拋梁東吳會他年駐八龍日轉九幽終出海川回萬里
盡朝宗

拋梁西百萬秦兵散合肥淨掃櫓歸太白不將金母
葬瑤池

拋梁南南極星辰應壽占雅奏凱風歸舜德瑞圖林鳥
自天銜

拋梁北北山猿鶴傳清蹕聞道幽州八駿回盡捲齊城
連即墨

拋梁上太極端門法乾象霄占弧矢射天狼德合昭回
真帝王

拋梁下坤軸九盤承大厦四海車書混一家却掃長鯨
固宗社

伏願上梁之後天臨斧宸神衛宗祧戎衣以示一怒舞
羽而格三苗國棟無撓虎臣不驍豐沛習威儀之雅康
衢載爾極之謠一清寓縣遙歸聖朝

英德殿上梁文

王介甫

天都左界帝室中經誕惟仙聖之祠夙有神靈之宅嗣
開宏構追奉睟容方將廣舜孝于無窮豈特尚漢儀之
有舊先皇帝道該五泰德貫二儀文摛雲漢之章武布
風霆之號華夏歸仁而砥礪蠻夷馳義以駿奔清蹕甫
傳靈輿忽往超然姑射山無一物之疵邈矣壽丘臺有
萬人之畏已葬鼎湖之弓劍將遊高廟之衣冠今皇帝
孝奉神明恩涵動植纂禹之服期成萬世之功見堯于
羹未改三年之政乃建重修之吉壤載營館御之新宮

考協前彙述追先志方嚴列峙寢門可象于平居廣祐
旁開輦路故存于陳迹官師肅給斤斲隆施揆吉日以
筮從舉修梁而考室敢申善頌以相歡謠

拋梁東聖主迎陽坐禁中明似九天昇皎日恩如萬國
轉春風

拋梁西瀚海兵銷大白低王母玉環方自執大宛金馬
不須齊

拋梁南內地星高每歲占千嶂滅烽聞嶺徼萬艘輸盡

引江潭

拋梁北邊頭自此無鳴鏑即看呼韓渭上朝休誇實憲
燕然勒

拋梁上彷彿神遊今可想風馬雲車世世來金輿王竿
年年往

拋梁下萬靈降社扶宗社天垂嘉種已豐年地產珍符
方極化

伏願上梁之後聖躬樂豫寶命靈長松茂猷兩宮之壽

椒繁占六寢之祥宗室蕃維之彥朝廷表幹之良章傳
慶譽代襲龍光肩一心而顯相保饋祀之無疆

單州行宮上梁文

王元之

竊以七十二家管仲記升平之迹千八百處桓譚述紀
錄之文蓋以王者易姓之初必受命而改制天下太平
之後乃加厚而增高煥乎皇王之大禮倬彼古今之茂
典粵自唐風不競巢寇暴興伏莽之徒盡聞鷄而夜舞
揭竿之士思逐鹿以橫行皇綱于是絲琴黔首以之瓜

割求小康之不暇廢大禮以誠宜我國家運應千齡化
數九有天符克正虛危朗而宗廟安地寶方登河洛清
而圖書出垂衣裳于堯殿走玉帛于塗山一戎而倒載
干戈萬國而混同文軌制禮作樂亦既表于成功降禪
登封尚未行于舊典望介丘而黯色見率土之翹心
遂使百辟具僚八荒夷長維沓緇黃之衆龍鍾耆艾之
人共傾葵藿之心求扣鳳凰之閣露封章而三進對冕
旒以遷延同歌時邁之詩請展告成之禮皇上俯從人

欲上荅天休鳴鑾特議於省方御路聿修于行闕莫不
務崇儉德屢降詔條巧墁剗剝之人來從公府櫟桷棟
樑之用出自神州見萬乘之為心無一人之勞力單州
武城縣者城惟古戴地即梁丘左倚宓堂子賤彈琴之
日右隣曹國文公觀魯之邦牧雁之沼漾于前佇玉之
丘亘其後澤通魯甸入哀公西狩之郊鄉號漢泉湛武
帝東封之井地理人事可得略諸監修殿直孫公貴連
七里家門可繼于金張內品梁公位列黃門勢望自齊

于冀石知縣邢州觀察推官崔公初筵曳履依王儉之
紅蓮百里字人憶陶潛之舊菊咸能戮力遂致偕功擇
嘉辰而先駕橫梁迎聖日而得開象闕莫之敢指無得
而踰爰陳善禱之文用壯非常之事

拋梁東東去金根御六龍祥雲未出參天嶽喜氣先生
見日峯

拋梁西西來鳳蓋拂雲霓祈福不勞藏玉牒禮天須至
用金泥

拋梁南瘴海朱方化已覃願獻江茅藉部泰競誇西鰈
與東鷄

拋梁北榆塞黑山兵久息助祭歡呼郡邸中荷璫舞拊
圜丘側

拋梁上瑞彩祥烟擁天仗丹鳳黃麟隨輦行萬歲三聲
滿山響

拋梁下微雨輕風導仙駕巖前奇獸縱游嬉山畔神光
生晝夜

伏願上梁之後我皇功格上帝恩流普天邦家兮如松
竹之茂子孫兮如瓜瓞之緜赫赫兮登三而邁五巍巍
兮君聖而臣賢同北辰兮居所等南山兮不騫庶齊休
于天地垂萬祀兮千年

建康行宮大殿上梁文

陳子高

宣王考室繼文武之緒而復興世祖祚基倣殷函之蹤
而永固皇天眷命相我國家主威初振于幕南聖跡載
臨于江左巍巍蕩蕩古稱帝王之州鬱鬱葱葱居有天

子之氣驗諸符讖允屬聖明下溫詔而申舊章營新宮
而作前殿體元立制希先聖之遺塵度執權宜極大人
之壯觀得庶隅之正合豐儉之中聳寥廓以崢嶸敞光
輝而神麗龍蟠虎踞形勝得于武侯藻井繡楣規模成
于謝傳九扉洞達雙闕雲浮肅劍佩而在廷奉冕疏于
當宁陳百寮而贊羣后基皇德而開帝功地轉天回髣
髴大梁之舊星環輻輳雍容四海之歸昇平之期頃刻
以冀乃消今日爰舉修梁迨此暇時張千門而立萬戶

可無興頌慕二京而賦三都蹈德詠仁式歌且舞

拋梁東地闢天開氣象雄江海雲霞升曉日華夷草木
待春風

拋梁西河漢昭回太白低聞道前籌并隴蜀要須傳檄
致羌氐

拋梁南陸輸閩粵漕江潭六代豪華何足紀聖君咸五
更登三

拋梁北星宿煌煌拱辰極指揮頃刻正諸華洒掃彤墀

朝萬國

拋梁上帝子尊嚴擬玄象戢戈休馬看明時協氣祥風
來景貺

拋梁下勤政飭農歲多稼戎夷種落避軍鋒西北東南
沾聖化

伏願上梁之後帝隆丕祚福萃上躬黃旗之運起于東
西赤縣之封還于圖籍自南自北衆多恐後于湯征卜
世卜年億萬至延于周歷願介繁祉大庇羣生

官宇 學校

平江府譙門上梁文

東南粵壤安堵者垂二百年表裏山河環居者踰十萬
戶持麾出守當宁蒐賢曩敵騎之長驅致名都之埽地
干戈甫定年穀屢登人心思樂土之鄉天子輟禁林之
重一新耳目果振風麾增修城郭之雄浸復里閭之舊
民欣載見盛及前時未崇譙閣之宏模猶闕會都之壯
觀惟翠閣之仰止矧羽檄之捷馳回鑾復返于神京警

蹕暫停于天仗非加偉壯曷表寅恭爰因衆志之樂為
遂建雄居而望幸層臺霞映曉角風傳從容卧治之餘
際會落成之日篇章間發森畫戟以凝香僚佐交歡據
胡床而嘯月共慶中興之盛行躋錫極之風敢奏歡謠
以申善頌

拋梁東十萬人家烟瓦中海色澄波春淡蕩日華披露
曉矇矓

拋梁西閭闔斜陽一望迷月竈會瞻星緯動玉闕新報

燧烟低

拋梁南春水滄浪水漲藍寒食故園猶舞蝶薰風新令
欲宜蠶

拋梁北虎寺蒼蒼呈瑞色窮邊聞道奏除書野老何知
蒙帝力

拋梁上百尺齊雲誇大壯風傳飛將定神京日望回鑾
駐天仗

拋梁下萬頃湖光連綠野聖德幽通玉燭明天波遠接

銀河瀉

伏願上梁之後皇風遠暢睿澤咸蒙罄綿宇永銷兵革
率編戶復業農桑穆穆嚴衷仰一人之端拱丕丕寶厯
享萬福以延洪寵賚專城之重風移澤國之雄野無
犬吠庭皆固空歌鹿鳴于小雅噦鸞聲于泮宮然後率
勵在官之守盡同戴后之忠享榮名于有永保休寵于
無窮

州治重建鼓樓上梁文

王元渤

七閩粵壤八郡名區推樵水之上游限長江之東境連
檣物貨引煮海之千艘比屋詩書列鳴絃之萬室獨譙
樓之未立在體勢以非宜工不告勞蓋續前修之緒財
非外取盡培經用之餘欲叙芳詞願停琴鼓

拋梁東焙土風烟杳靄中邑入滄溟含瑞雪聲隨雷鼓
轉春風

拋梁西峭石高峯聳碧梯腸斷行人山路滑飛猿猶傍
嶺邊啼

拋梁南路入長汀
遠翠嵐古佛千年常住世喧轟
鐘鼓奉伽藍

拋梁北路入聖朝
無限域莫誇宿處是江南
雲際參天分黛色

拋梁上斗牛
瑞氣呈乾象一卿二相更同時
可驗台星

分兩兩

李綱黃潛善同日拜相
黃潛厚為戶部尚書

拋梁下水接延津
光焰夜春溪夾岸下長腰
秋日平田

觀穰稔

伏願上梁之後兵戈永息疫癘潛消年年慶五穀豐登
日日聞滿城歡笑爾無虞而我無詐鄰邦之惡客相忘
田邇畔而漁邇隈一境之善人是富成上州之譽望平
尺水之風波右轄中台昭武兼昭文之盛龍頭榜眼紅
榴呈紅桂之祥鎮千里之生民成一方之雅俗

筠州新堂上梁文

崔德符

郡城幽邃介居吳楚之鄉臺府深嚴迴處江湖之勝鼓
角鳴于天上幢蓋出于雲中豈非閬苑之峯恐是蓬山

之島昔營道院名擅江西屬屢易于歲時莽空餘于瓦礫自我某官肅驅隼旂雄綰虎符下車而德洽化孚期年而人和物遂丹鳳棲連枝之瑞靈芝發甘露之祥圉土一空燕居多暇爰瞻舊趾大作新堂煥然丹碧之開宛若神仙之第簪纓接袂士女駢肩不知經始之勤願助落成之喜

拋梁東人在丹霄紫府中知有玉皇香案吏詔書時下
紫微宮

拋梁西層簷飛拱與雲齊猶恐雙旌留不住去騎驕馬
踏沙堤

拋梁南山采翠入疎簾公堂白日渾無事但覺蓮花
漏水添

拋梁北一片連空烟瓦碧幅巾道服上雲林使君自是
浮丘伯

拋梁上萬里錦聯供一望不須烟景入春風自有雲山
開步障

卷九十二
拋梁下下看鵬騫與龍掛水氣昏昏浪颭空雲容淡淡
天垂野

伏願上梁之後官曹無事上下相安農畝有秋公私皆
足遂革帶刀之俗永凝畫戟之香犴獄無人鞭笞不試某
官琴樽高興聊同方外之游富貴長年倘享人間之福
與四民而共樂均千里以同歡

靖武門上梁文

黃魯直

全魏大名冀州右部二聖豫游之近地九河綿絡之奧

區旁控齊秦仰占畢昴允文仁祖照卜離都神明之所
護持耆老于茲望幸今皇帝繼序來孝緝熙武功寢威
八紘垂統萬世開經禮而潤色鴻業一道德以照臨百
官廼眷北門實陪天邑卧貌虎三軍之旅屹雲烟萬雉
之城畀宗廟之守臣鎮中原之重勢恭惟留守安撫太
師侍中承天之柱石謀國之耆龜能斷大疑克勤小物
不動聲色而清列郡不越樽俎而折遐衝泰階六符光
鄰樞極河潤九里福浸京師朔戎空老上之庭左袵賀

藁街之邸當其無事而早從事修於未然而禁將然民
力有餘因可以教戰王者無外何求于閑闕乃啓扉以
延不周之風時觀兵以勤靜武之略伴圖入獻俞詔誕
敷日吉辰良龜從筮叶工獻太樸屋呈環材珣虹梁以
上躋聳陰闕以壯觀落以盛食勸之鳴蓼請奏詩謠用
休工作

拋梁東師垣講武靜邊烽
貊弓拮矢年年貢
海岱淮徐
歲歲豐

拋梁西威行河外息征輦降書已望龍堆入積甲還將
熊耳齊

拋梁南威弧南指射狼貪交州螻蟻方歸命下瀨熊羆
即解嚴

拋梁北不戰威邊收上策保塞單于獻馬羊愛民天子
捐金帛

拋梁上河繞凌雲宮闕壯南面憂民不豫游北門典鑰
留台相

拋梁下元老歸功安廟社千里金堤水正東四時玉燭
年多稼

伏願上梁之後朝廷日新憲度歲計明昌相臣將臣兩
有文武綏服要服八荒梯航增太山之封而百神受職
奉明堂之祀而萬壽無疆留守已勤於屏翰國家終
倚于贊襄是以有上公之袞歸來近天子之光玉節乘
輅方趨周道芝泥封詔必下巖廊

披雲樓上梁文

陳無已

夙夜在公必有燕休之地上下同樂孰知興作之勤惟
此東州號稱輔郡遺澤未息猶有陶漁之風王化既成
更同齊魯之俗河山千里枹鼓不鳴閭巷百年豪傑間
出地滋墾闢歲嗣豐穰里無愁嘆之聲吏絕追呼之擾
因斯民之暇豫樂此地之登臨革故增高事非過制斷
長續短費不及民林宇靚深稱吏民之觀望歲時游豫
遂老幼之歡娛爰歷靈辰用興危架聽于輿頌落此成
功

拋梁東日上雲開四顧中今代功名歸二老當年富貴
有朱公

拋梁西陰陰桃李下成蹊舉頭更覺長安近送目長隨
落日低

拋梁南舳艫銜尾繫江潭朝濟已作豐年雨暑飲行聽
抵掌談

拋梁北瑞塔亭亭入雲直百年鬪戰及明時千里河山
餘故國

拋梁上危架宮堯建千丈房心璀璨近簷楹海岱摧藏
但空曠

拋梁下割肉成堆酒如瀉燕雀投人也自忙鼠蝠旋墻
不容罅

伏願上梁之後人神同力暘雨以時水宿途行夜無風
露之警盆縲鑣割家有囊廩之餘囹圄一空鞭笞不試
商旅四集貨賄遂通據榻以談不減庾公之化從游而
賦尚須韓子之文

大成殿上梁文

陳阜卿

金聲玉振揭聖道之宏模矢棘葦飛聳儒宮之壯麗相
維勝地雄視此邦山羅秀色以回環溪長帶流而演迤
翼翼占坤維之勢閭閻毓人物之英不幸斯文中遭俗
子為吾儒而弗切毀鄉校以無餘廟貌淒涼衣冠慨嘆
豈有道關百世不能身庇一椽會際丕平垂衣裳而治
天下大興美化恢庠序以徧海隅爰即故基一新邃殿
羽籥盛陳于東序豆蓬肅薦于前楹豈惟稱高明之居

抑亦起頽靡之俗官無病費民不知勞隻身經營方笑
鴟鴞之作室旁觀聳動忽驚蛟蜃之吐樓因舉修梁用
申善頌

拋梁東槐市如今復舊宮二十年來樵牧地一朝氣象
壓兵戎

拋梁西日薄風清濯練溪歸詠聖門無一事便應言下
棄筌蹄

拋梁南天矯雙龍戲碧潭中有一珠留萬古他年大手

屬誰探

拋梁北高閣昂霄連斗極雲漢昭回萬國瞻諸生何以
酬君德

拋梁上燿燿少微佳氣王昨夜光芒下泮宮定應從此
多卿相

拋梁下聒聒絃歌聞里社不獨三千弟子賢樵夫亦有
談王者

伏願上梁之後文風載郁教雨旁流青衿無逸于城闕

紫微不韋於苑頭悉奉韋經之教應多魯服之求家興
孝弟訟息爭仇錯履紛袍茂彬彬之文質離疏釋蹻化
袞袞之公侯

明倫堂上梁文

法三代以明倫肇開宏館本六經而立說大振斯文惟
茲禮義之宮曩盛清儒之席自經遷毀垂三十年坐視
因循踰八九政望荆榛之觸目悵絃誦以無聲道不終
窮時乎忽至知郡監丞政知先務洪宣常袞之風通判

學士畫盡婉謀力贊文翁之化爰傾府庫用相斧斤革
馬隊之喧囂復鱣堂之壯麗增高數仞厦廣千間翕然不
日而成恍若從天而下洋洋灑灑儼衿佩以來遊鬱鬱
葱葱羅溪山而呈秀俄增士氣益壯邦風因舉修梁庸申
善頌

拋梁東大明屋角光瞳矐六經在天不可掩聖道知如
日月同

拋梁西虛堂秋入雨淒淒青錢事業安排取莫對槐黃

歎巨題

拋梁南薰風轉午屋潭潭日長正是添書課勿使牙籤
蠹白蟬

拋梁北樞衣入侍先生側君看木鐸走四方倚席不談
真素食

拋梁上葉葉五雲分絳帳勿歎寒酸借壁光即看夜訪
青藜杖

拋梁下從流一決如奔馬仰高不解踵顏淵定見紛華

從子夏

伏願上梁之後人習俎豆家聞絃歌士不廢于三餘師
克肅于四教聯翩駿足來昂昂千里之駒整頓飛翰集
噦噦九苞之羽

府第

皇子嘉王府第上梁文

陳子高

武丁孫子功德紀于商詩文王本支聲聞流乎周雅洪
惟盛世繼有賢王既出奉于燕朝必肇新于邸第皇子

嘉國大王鍾聖君之愛實元妃之生德高麟趾之風貌
有龍章之表習河間之禮樂擅子建之文章夙啓真封
先姬姓之有國留朝禁闥長劉氏之諸王衆推大雅之
不羣生知為善之最樂苴茅受社而垂兩組奏對執觴
而冠珥貂珣輦豫游益虔于警衛紫宸宴衍每侍于清
光熒煌陳廡之金烜赫耀庭之璽典司嚴掖均適宿于
適臣給札大庭將校文于多士皇帝陛下繼三王之絕
業躡五帝之高蹤治格升平澤流遐邇堯帝多男之祝

益大天支漢家諸子之封浸強國勢眷茲哲嗣早著令
名既畢冠儀將成婚禮肆大開于甲第乃密邇于宸居
隆棟華棖拱星辰于北闕畫橋朱閣通花萼于南樓敞
曲觀于招賢闢側門而通禁梁臺既就必命鄒枚之賓
陳苑初成自致應劉之友豈特效宗藩之安宴蓋將追
前哲之風流載選休辰式升修棟

拋梁東帝子橫經齒學宮玉殿問安迎曉日槐宸唱第
快春風

拋梁西詩成七步少陵齊洛陽橋就仙花別太一池新
瑞靄低

拋梁南帝御明堂政化覃便有好風經鴈沼更欣嘉雪
滿猿巖

拋梁北接武前星常拱極帝績由平朔易功天威已震
單于國

拋梁上傑閣重樓人景仰五王居近接崔嵬萬歲山高
增壇爽

拋梁下宮僚望幸鸞龍駕開筵內府出金錢賜酒天邊
來玉竿

伏願上梁之後維城益固磐石增強日奉寢門之間時
占宮掖之祥勒高勲于麟閣接清問于明光堅一心之
忠孝保百世之隆昌

馬迹上梁文

孫仲益

四郊烽火誕彌蛇豕之墟一島風烟宛在鼃鼃之窟鳴
機出鮫人之館浮杯開梵帝之宮偶避地于兵間遂問

津于耕者鴻慶居士數竒半世多難百罹救過吹蠶憚
心喘月平生許國卧陳登百尺之樓晚歲營巢住揚雄
一區之宅命龜三卜避盜五遷獨行鷗鷺之羣共集鷄
豚之社半山銜日落帆影于坐中萬壑留風過樵聲于
枕上蓬茅不剪畚鍤自隨遙開白板之扉緩扣烏犍之
角兒童拍手競欲挽鬚婦女磨門那聞轆釜泥田父瓦
盆之飲荷園官菜把之恩悵昨夢之已非佚吾生於既
老木居士安能為福亦又何求土偶人自得所歸于焉

是息共此百家之聚大同一笑之歡

拋梁東春入山林處處同澗草不除隨意綠巖花無主
為誰紅

拋梁西亂棘孤藤刺眼迷雀啄風前紅皺墮魚跳波底
碧圓低

拋梁南鼻息齁齁午睡酣一簟清風吹酒醒槐宮不見
府潭潭

拋梁北萬頃滄波圍澤國風引仙舟到復回山人俗駕

何須勒

拋梁上霜餘木杪浮新漲宵教百鬼瞰高明怨鶴驚猿
號夜帳

拋梁下燕雀紛紛來賀厦吳王宮殿舊巢空共此蓋頭
茅一把

伏願上梁之後蛇蛟結蟠犬鷄蕃息野蔞大如甕盎禾
困高若坻京遇桑間之餓人一飽之恩猶在覩梁上之
君子大千之劫無因凡我往來共茲快樂

西徐上梁文

踐蛇茹蠱脫身五嶺之阨補剋息黥歸老三家之市桑
麻接畛鷄犬交音已免賈生問鵬之憂遂諧韓公見蝎
之喜富陽故侯炎海蟲蛇之侶玉川蟻虱之臣屬聞晏
嬰齊屨之言遂解鍾儀楚冠之繫蝸盤兩角已同墜甌
之觀貉共一丘豈恨虛舟之觸向空而書咄咄擊缶而
和烏烏望故家以終焉羨吾生之休矣廼占吉日爰舉
修梁隣翁異爭畔之嫌山靈有築垣之助地偏壤沃井

冽泉甘豈徒戀三宿之桑固將面九年之壁老蟾駕月
上千巖紫翠之間一鳥呼風嘯萬木丹青之表黃帽釣
寒江之雪青蓑披大澤之雲行隨烏鵲之朝歸伴牛羊
之夕擁百結之褐捫虱自如挂九節之筇送鴻而去問
里緩急皆春秋同社之人兄弟團圓共風雨對床之夜
盍罄善頌以佐歡謠

拋梁東卧占寬間五百弓一榻清風殘酒裏半窓花影
日曈曈

拋梁西落日投林急鳥棲一抹殘紅猶未斂半鉤新月
掛簷低

拋梁南彌勒年來共一龕繞樹時聞鳥嘯嘯彎弓莫向
虎眈眈

拋梁北一取單于老無力且令斗水百憂寬莫遣家書
萬金直

拋梁上萬壑烟雲集遐想顛倒山翁白接離光芒太一
青藜杖

拋梁下去去從今事桑柘好與龜鶴作主人更取豚魚
燕同社

伏願上梁之後千瓶解崇三揖送窮人貌看年年歲歲
之同花枝見夜夜朝朝之好以二百五十畝公田之入
盡歸酒姥之家為三萬六千日醉鄉之游獨占地仙之
籍

春風樓上梁文

張敬夫

肯堂在念慨百年詩禮之傳結宇馮高當三楚山川之

勝眷懷舊址久委荒榛獨存垂世之文莫掩盡心之旨
爰因地僻更敞樓居睇前嶺之烟雲自為舒卷俯寒江
之鷗鷺何有去來方將棲列聖之遺經述前人之妙意
矧在原之同好有伐木之求仁豈止為歡美之娛蓋共
樂講論之益當如曾子長詠春風之中寧比仲宣徒結
故鄉之戀載咨良日肇舉修梁敢酌予心允為善頌
拋梁東若木升暉萬國同肯學野人烘背穩獨傾葵向
皦丹中

拋梁西萬里岷峨晚照低誰識江湖未歸意也應多謝
子規啼

拋梁南嶽鎮當空聳碧嵐坐覺羣峯皆拱手曾登絕頂
小江潭

拋梁北中州目斷還心惻君王神武似高皇看埽妖氛
奠皇極

拋梁上天德維清人共仰只于不息驗端倪太極分明
涵萬象

拋梁下靜倚闌干觀物化羣生鼓舞荷陽春萬水通流
無晝夜

伏願上梁之後惟天所相進道無魔凡登吾樓各具正
見息邪距詖期不顯于斯文舉足出言用克祇于先訓
自茲以往夫復何求

博見樓上梁文

呂貴克

一行作史誰知叔夜之非心三徑就荒每嘆淵明之悟
往屬道路歷山谿之險而軒裳困荆棘之深回思痛定

之堪驚始見閒中之有樂興來無盡老去何求爰因一
畝之宮漫葺數椽之舍琴書左右詩酒從容方將篤志
以修身尚欲馮高而博見山川景物盡收千里之奇雪
月風花俱得四時之勝飛甍在目巨棟凌空述我情懷
寓諸歌詠

拋梁東桑梓清陰一望中懷土不須頻起念人生流轉

似飄蓬

居士本
建人

拋梁西樵水淵源出此溪疊嶂層巒爭秀麗不堪遙望

白雲飛

雙親松楸
在西山

拋梁南聞道仙人隱翠嵐直下龍蟠今幾載何時夭矯
出澄潭

拋梁北萬井人家羅巷陌時康雅俗自熙熙簫鼓樓臺
迷曉夕

拋梁上天宇澄清涵萬象三辰炳煥古猶今底事人空
談幻妄

拋梁下弦誦琅琅喧子舍寄言努力聖賢書氣質應須

求速化

伏願上梁之後門庭肅肅長幼怡怡朋儕談道義之言
達近息鄉隣之鬪辰良日吉宜團圓聚集之歡暑雨梅
蒸輸老懶高明之眺賞心得趣安宅無窮

白鶴新居上梁文

蘇子瞻

鷺城萬室錯居二水之間鶴嶺一峯獨立千巖之上海
山浮動而出沒仙聖飛騰而往來古有齋居號稱福地
鞠為茂草奄宅狐狸物有廢興時而隱顯東坡先生南

遷萬里僑寓三年不知歸與之心更作終焉之計越山
斬木泝江水以北來古邑為隣遶牙檣而南峙送歸帆
于天末掛落月于床頭方將開逸少之墨池安稚川之
丹竈去家千歲終同丁令之來歸有宅一區聊寄揚雄
之佳處今者既興百堵爰架兩楹道路來觀里閭助作
願同父老賽鄉社之鷄豚已戒兒童惱北隣之鷺鴨何
辭一笑之樂永結無窮之歡

拋梁東喬木參天梵釋宮盡道先生春睡美道人輕打

五更鐘

拋梁西
嫋嫋虹橋跨
碧溪時有使君來
問道夜深燈火
亂長堤

拋梁南
南江古木蔭
回潭共笑先生垂
白髮舍南親種
兩株柑

拋梁北
北江江水搖
山麓先生親築釣
魚臺終朝弄水
何曾得

拋梁上
壁月珠星臨
蕙帳明年更起望
仙臺縹緲空山

隘雲仗

拋梁下鑿井疏畦散隣社千年枸杞夜長號萬丈丹梯
誰羽化

伏願上梁之後山有宿麥海無颶風氣爽人安陳公之
藥不散年豐米賤林婆之酒可賒凡我往還同增福壽

五百家播芳大全文粹卷九十二